

Preistorgia

Istorgia dal territori grischun en furma concisa, part 1

■ L'istorgia dal Grischun cumpiglia las suandantas epocas: il temp preistoric, l'epoca romana, la Currezia medievale, la Republica da las Trais Lias (1524–1798), il chantun Rezia (1799–1803) ed il chantun Grischun (a partir dal 1803). En ina pitschna seria mussa «Chattà» co ch'il territori grischun è sa sviluppa tras il temp.

Temp da crap

Paleoliticum

Il paleoliticum, il temp da crap tempriv, cumpiglia la pli veglia epoca da l'istorgia da l'uman. Quest'istorgia para d'avair prendi s'entschatta avant blers millis onns en l'Africa Oriental e Meridionala. Il territori da las Alps è stà cuvert pliras giadas totalmain da glatsch en il decurs dals blers millennis. Tranteren hai dà pli lungas epocas senza glatsch cun temperaturas pli autas. En quests temps interglazials han mintgamai plantas, animals e pli tard er l'uman prendi possess da la terra. Ils pli vegls utensils da quests umans eran fatgs da crappa tagliada. Pli tard han ils umans preparà utensils da silex (crap da fiu), dad ossa e da corna.

En il temp



da glatsch medievale è la fuaina daventada il center da la culegna e da l'avdanza che sa chattava il pli savens en in cuvel. Ils umans vivevan dals fritgs rimnads e da la chatscha. Il motiv d'animals dominava l'art e dat qua tras perditga d'ina chatscha reglada d'in ritus. Sepulturas e chats d'unfrenda èn mussaments d'ina religiun primitiva. Dal paleoliticum tardiv derivan ils emprims chats archeologics dal Grischun (Cuira, Marsöl).

Mesoliticum

Las relaziuns climaticas pli chaudas a la fin dal davos temp da glatsch han laschà daventar l'uman dal mesoliticum (temp da crap mesaun ca. 8000–4000 a.C.) in chatschader fitg spezialisà ed universal. La natira ha furnì da quel temp selvashina, peschs, fritgs ed ervas en quantitads bler pli grondas ch'als chatschaders dal temp da crap tempriv. Questa furma economica vegn ad avair carmalà l'uman da chattar adina novs reviers da chatscha. Ils curs dals flums han er mussà la via al traffic.

Ils umans dal mesoliticum han fabricat lur utensils or da silex. Quai è in material fitg dir che sa lascha dentant elavurar fitg bain.

En la fasa finala dal mesoliticum è succedida la midada tar ina furma d'economia purila dal tuttafatg nova, numnadain tar ina produziun da vivonda planisada tenor il ritmus da las stagiuns. En il Grischun èn ils origins da questa transiziun cumprovads en la Val Mesauc.

Neoliticum

En il neoliticum, il temp da crap tardiv (ca. 4000–1800 a.C.), hai dà ina da las pli grondas midadas culturalas ed econo-



Dal Marsöl a Cuira (a sanestra) derivan ils emprims fastizs umans scuverts en il Grischun.

(FOTO: PD)

micas da tuts temps. D'in chatschader nomadisant e fitg spezialisà sa mida l'uman en in pur che producescha tenor plan. El tegna animals (arments, nursas, chauras, portgs) e cultivescha plantas (graun, fava e.a.). Dumagnar la tratga da muvel e l'agricultura pretendia in'enorma avertadad spiertala. Per runcar e cultivar pastgiras ed ers sco er per construir in sutetg stabel era la sigir gist inventada in utensil da muntada extraordinaria. Per consequenza da questa sedia stabla en chasa e culegna ha l'uman er inventà tranter auter iseglia d'arar, il fis ed il taler. Ina novaziun caracteristica è era stada la chermica. En tala vaschella da terracotta resistibla cunter il fiu ha ins pudì coier la vivonda e conservar las provisiuns per l'enviern a moda segira.

Temp da bronz

Il temp da bronz cumpiglia il spazi da temp da ca. 1800–800 a.C. En questa epoca cumpara per l'emprima giada in nov metal, il bronz, ina lega da 90 pertschient arom e 10 pertschient zin. Utensils da bronz han entschet pli e pli a remplazzar ils utensils da crap, dad ossa ed ils paucs utensils d'arom dal neoliticum.

Er l'uman dal temp da bronz era pur. Tras runcar cun agid dal fiu ha el gudagnà nova cultura or dals guauds primitivs, ha cultivà ers e pratitgà la tratga da muvel. La chatscha aveva be anc ina muntada secundara. La cumparsa da novas professiuns, sco quella dal minier, dal fravi da bronz e dal martgadant da metals vegn segiramain er ad avair chaschunà ina midada da las estructuras socialas.

Il temp da bronz en il Grischun

Il Grischun vegn populà intensivamain pir en il temp da bronz, e quai fin en las valladas las pli allontanadas. Culegnas e necropolas dal temp da bronz èn da chattar en l'Engiadina, en Surses, Tumle-

stga, Val Schons e Valragn, en la Mesolcina, en la Vallada dal Rain da Cuira, en il Scanvetg, en Surselva e Lumnezia. Las bleras culegnas han lur origin pir en il temp da bronz tempriv (ca. 1800–1500 a.C.).

En il spazi da las Alps è sa furmada in'atgna cultura dal temp da bronz. Entaifer curt temp èn novas culegnas vegnidas costruidas, oravant tut sin muttas che furmavan ina protecziun strategica. Igl è segiramain nagina casualità, sche restanzas culturalas or dal temp da bronz sa chattan savens sut las ruinas da chastels dal temp medievale. En il material chattà da questas culegnas dal temp da bronz en il Grischun èsi da constatar ina ferma influenza dal sid e dal nord.

Temp da fier

Il temp da fier cumpiglia l'epoca da circa 800–15 a.C. Ella sa dividea en il temp da Hallstatt (800–ca. 450 a.C.; numnà tenor il lieu da scuverta Hallstatt en l'Austria) ed en il temp da La Tène (ca. 450–15 a.C.; numnà tenor il lieu da scuverta La Tène al Lai da Neuchâtel).

La transiziun dal temp da bronz al temp da fier sco er dal temp da fier vegl al nov è succedida senza ina cesura culturala. Quai cumprova la cuntinuitad da la populaziun.

Il Grischun sa dividea durant il temp da fier en trais regiuns pulit differentas ch'èn sumegliantas a quellas dals gronds vischins e che vegnan designadas sco part alpina da quellas. En il sid da las Alps vivevan ils Leponts; da quels savain nus anc oz fitg pauc. L'Engiadina Bassa era populada d'in pievel ch'aveva ses origin en il Trentino/Tirol dal Sid e che vegn numnà ils Rets. En il Grischun Settentrional e Central eran ils Celts da chasa. En questa regiun èsi dentant er da constatar influenzas dals Leponts e dals Rets.

Il fier ha remplazzà pli e pli il bronz. Fier d'ina qualità inferiura n'era betg senz'ater meglier ch'il bronz. In grond avantatg era però che quel era da chattar en l'agen pajais.

La cumpariziun da novs elements culturalis fitg decisivs en il temp da fier, sco la scrittira e la munaida, ha er midà plaun a plaun las furmas economicas. Differenzas socialas èn da constatar en ils inventaris pli ritgs e pli vegls da fossas, surtut en il Grischun dal Sid.

Il temp da fier en l'Engiadina

En l'Engiadina Bassa cumpara en il temp da bronz tardiv ina nova gruppa da cultura cun in'atgna chermica fitg caracteristica, l'uschenumnada chermica da Laugen-Melaun. La furma directiva da quella è la cria.

L'origin da questa cultura è da chattar en il Trentino/Tirol dal Sid. Questa cultura è er anc da chattar en il Tirol Oriental, en il Vorarlberg, en la vallada dal Rain alpin, en Tumleatga e Surses.

In'è dentant betg da survesair che be l'Engiadina Bassa appartegna al territori central da questa cultura, entant che las ulteriuras valladas menziunadas dal Grischun giaschan gia en ina zona periferica.

Questa cultura da Laugen-Melaun vegn remplazzada en il temp da fier tempriv da l'uschenumnada cultura da Fritzens-Sanzeno; la furma directiva da quella furman las tipicas cuppas.

Il center da questa gruppa da cultura giascha puspè en il Trentino/Tirol dal Sid ed en l'Engiadina Bassa, latiers vegn il Tirol dal Nord. Il Vorarlberg, la Vallada dal Rain, la Tumleatga e Surses vegnan strusch tutgadas da questa cultura.

Sin fundament da la derasaziun da la cultura da Laugen-Melaun e da Fritzens-Sanzeno vegni supponì oz ch'ils exponents da quellas culturas èn identics cun ils Rets da l'istorgia.

Il Grischun sco tal appartegna en il meglier cas al territori periferic, dentant betg al territori central da la cultura retica.

Davart la preistorgia da las valladas meridiunalas

Las scuvertas preistoricas da las valladas meridiunalas sa differenzieschan pertutgant lur cumparsa exteriura cleramain da quellas dal nord da las Alps. Tar la construcziun da la via nazionala han ins scuvert al pe dal chastè da Mesauc ina da las pli veglias culegnas dal Grischun. Ella è da datar enturn 4500 a.C., quai vul dir en il temp transitoric dal mesoliticum al neoliticum.

Al medem lieu, dentant in fin dus meters sur l'orizont da la cultura mesolitica-neolitica han ins chattà ina rasada d'ina culegna or dal temp da bronz tardiv.

Da Castaneda enconuschan ins ina culegna dal temp da crap cun fastizs d'in er arà cun arader.

E dal crest dal chastè sper Mesauc deriva ina sigir da crap dal temp neolitic. Da la Val Müstair, dal Puschlav e da la Bregaglia èn enconuschents varsaquants chats singuls or dal temp da bronz e da fier.

Enavos en il gavel tschientaner a.C. tanschan las numerusas fossas dal temp da fier ch'èn vegnidas scuvertas a Mesauc, Cama e Castaneda. Insatge pli giuvna è la necropola (champ da fossas) da Sta. Maria d.C. Ultra dal champ da fossas è er enconuschenta la culegna correspundenta a Castaneda.

Il Grischun dal Nord durant il temp da fier
Durant il temp da fier pon ins constatar en il territori grischun pliras gruppas da cultura. En il sid da las Alps, en la Mesolcina, vivan ils Leponts. Ils Rets èn da chattar en l'Engiadina Bassa e per temps er en singulas parts dal Grischun Central e Settentrional. En il Grischun Settentrional viveva però principalmain ina populaziun celtica.

La fasa tempriva dal temp da fier pli vegl u da Hallstatt è enconuschenta en il Grischun Settentrional be tras paucs chats singulas, sco per exempel tras la cuppa en duas colurs da Favugn, decora da cun in bul, u tras la nizza d'ina sigir da Molinis.

La fasa tardiva dal temp da Hallstatt vegn documentada a moda fitg impressiunanta tras il champ da fossas da Tumain. Restanzas da culegnas da l'uschenumnà orizont da Tumain èn tranter auter vegnidas chattadas a Cuira/Welschdörfli, Fläsch/Pass da S. Gliezi, Haldenstein/Lichtenstein e Cazas/Cresta.

Il temp da fier pli giuven u da Latène (450–15 a.C.) è represchentà en il Grischun Settentrional tras culegnas da l'uschenumnà orizont da Schneller a Cuira/Welschdörfli, Fläsch/Pass da S. Gliezi ed autras.

Dal temp da Latène tardiv (150–15 a.C.) èsi surtut da numnar las culegnas da Lantsch/Bot da Loz, Scharans/Spundas, Panaduz/Bot Panadisch e Trun/Grepault.

La cumparida da la scrittira e dal danner en il temp da fier pli giuven ha gi ina gronda influenza sin ils secturs culturalis ed economicis dal territori da las Alps. La scuverta dal stgazi da munaida a Cunter/Bravuogn a la ruta dal Güglia e Set conferma quai a moda impressiunanta.

Tge san ins dals Rets?

L'interpretaziun da la tradiziun scritta mussa ch'ils Rest eran enconuschents als scripturs da l'antica be a l'ur da l'Italia dal Nord, il plitgusch en il conturn da Verona e Trento e forsà anc enturn Como. Tenor Strabo e Plinius abitavan ils Rets er en il territori da la Vallada dal Rain. Accordanza exista pia en la tradiziun istorica be concernent il fatg che tut ils Rets han appartegnì al territori da las Alps.

Davart la lingua dals pievels che vegnan designads sco Rets na pon ins strusch dir insatge. Trets d'ina tscherta dimensiun che sa laschassan chapir areguard grammatica e cuntegn mancan dal tuttafatg. Avant maun èn curtas inscripziuns, spezialmain dal sid da las Alps, ch'èn chapiblas be per part. Las paucas inscripziuns oriundas da l'Engiadina Bassa èn scrittas en l'alfabet da Balsaun ch'è ina varianta da l'alfabet «nordetrusc» u «subalpin».

Las indicaziuns istoricas documentadas or dal temp roman sa cuvran per gronda part cun il territori da derasaziun da la cultura da bronz da Laugen-Melaun e da la cultura dal temp da fier Fritzens-Sanzeno. Il territori central da quellas culturas sa chatta en il Trentino/Tirol dal Sid. Sco purtaders da quellas culturas da Laugen-Melaun e Fritzens-Sanzeno valan ils Rets.

Cun l'erecziun da la provinza Raetia dal temp dals imperaturs sa schlargia la noziun d'ina gruppa etnica cun ina lingua speziala sin ils abitants d'ina provinza e qua tras è ella daventada pauc transparenta.

La presentaziun:

Dossier «Istorgia dal Grischun en furma concisa».

Dapli infurmaziuns:

chatta.ch/?hiid=1879
www.chattà.ch



Crestarta sper Surin (collina a dretga) – in'importanta perditga da la cultura interalpina dal temp da bronz.